

於慶尚道○昧爽東方有氣如火光夜東方赤氣耀於天際北方坤方有氣如火光○已未玉堂上劄曰二百年所未有之變出於聖明之世至使廟社播越乘輿蒙塵凡在含生孰不憤惋欲死而中外臣僚或有不分逆順顯為從賊之論者其武夫無知容可置之不問以安反側至如李安訥之身居宰列黃致敬之位任通顯公然對人肆發悖逆之言聞者膽裂欲磔其肉朴來章則入城附賊人多見之國言藉藉昭不可掩而兩司以耳目之官主一時公論尚無糾劾論罪之舉至於竒益獻汎濫陳疏人所共憤而喉舌之官泛然捧入失職甚矣亦不彈駁其間或有臨事預議旋即呈告規避者言官風采掃地盡矣請兩司並適差 荅曰此時人言豈可盡信兩司無虧損風采之事不允於是大司憲徐渚執義李垓掌令金尚持平李德洙吳竣獻納鄭百昌正言辛啓榮以被斥引避司諫吳翮亦自列規避之斥大司諫李晬光正言權鏞等處置並適之○備邊司啓曰今年冬防當依張晚榻前之啓調入而三南軍士時在昌義者尚有三四千夏節則以此分守江邊兩西之軍至秋冬調入為當且西兵變亂之後必多戰亡逃竄者宜令兩道監司一一查問見存之數從之○特命拜張晚右贊成○上引見掌令張顯光於資政殿 上曰聞名久矣思欲一見共